

全上古三代秦漢
三國六朝文

晉宋

第六函
第十冊

全晉文卷一百四十七

烏程嚴可均校輯

前趙

劉淵

淵字元海新興匈奴人左賢王劉豹子魏末爲侍子在洛陽太康中代父豹爲左部帥拜北部都尉楊駿輔政已爲建威將軍五部大都督封漢光鄉侯元康末坐事免成都土獺表行寧朔將軍監五部軍事永興初爲冠軍將軍封盧奴伯尋拜北單于參丞相軍事行至左國城自稱漢王改元元熙都離石永嘉二年僭卽皇帝位國號曰漢改元永鳳其明年改元河瑞呂晉永嘉四年死在位七年諡曰光文皇帝廟號高祖

卽漢王位下令

昔我太祖高皇帝曰神武應期廓開大業太宗孝文皇帝重曰明

德昇平漢道世宗孝武皇帝拓土懷夷地過唐日中宗孝宣皇帝
搜揚雋人多士盈朝是我祖宗道邁三王功高五帝故卜年倍于
夏商卜世過于姬氏而元成多僻哀平短祚賊臣王莽滔天篡逆
我世祖光武皇帝誕資聖武恢復鴻基祀漢配天不失舊物俾三
光晦而復明神器幽而復顯顯宗孝明皇帝肅宗孝章皇帝累葉
重暉炎光再闡自和安已後皇綱漸頽天步艱難國統頻絕黃巾
海沸于九州羣閹毒流于四海董卓因之肆其狂勃曹操父子凶
逆相尋故孝愍委棄萬國昭烈播越岷蜀冀否終有泰旋軫舊京
何圖天未悔禍後帝窘辱自社稷淪喪宗廟之不血食四十年于
茲矣今天誘其衷悔禍皇漢使司馬氏父子兄弟迭相殘滅黎庶
塗炭靡所控告孤今猥爲羣公所推紹修三祖之業顧茲尪閭戰
惶靡厝但已大恥未雪社稷無主銜膽棲冰勉從眾議

晉書載紀
劉元海傳

十六國
春秋一

大四百八十一
小二十六

致王彌書

已將軍有不世之功超時之德故有此迎耳遲望將軍之至孤今親行將軍之館輒拂席洗爵敬待將軍

晉書王彌傳十六國春秋九

劉粲

粲字士光劉聰太子呂晉太興元年嗣偽位改元漢昌爲其臣靳準所殺諡曰隱帝

請殺愍帝表

子業若死民無所望則不爲李矩趙固之用不攻而自破矣

十六國春秋

秋四 案崔鴻原書久亡今本係明屠喬孫項琳之二人彙輯羣書重加編造其所載文翰都有所本然亦有未詳出處者姑錄之俟攷後皆放此

劉曜

曜字永明淵從兄子歷仕至相國都督中外諸軍事呂晉太興元年卽僞位改元光初其明年改國號曰趙在位十三年爲石

勒所減

下令議除漢宗廟改國號

蓋聞王者之興必禘始祖我皇家之先出自夏后居于北夷世跨燕朔光文曰漢有天下歲久恩德結于庶民故立漢祖宗之廟曰懷民望昭武因循遂未悛革今欲除宗廟改國號御曰大單于爲

太祖亟議曰聞

十六國春秋五

下書追贈崔岳等

蓋褒德惟舊聖后之所先念惠錄孤明王之盛典是曰世祖草創河北而致封于嚴尤之孫魏武勒兵梁宋追慟于橋公之墓前新贈大司徒烈愍公崔岳中書令曹恂晉陽太守王忠太子洗馬劉綏等或識朕于童胤之中或濟朕于艱窘之極言念君子實傷我心詩不云乎中心藏之何日忘之岳漢昌之初雖有褒贈屬否運之際禮章莫備今可贈岳使持節侍中大司徒遼東公恂大司空

南郡公綏左光祿大夫平昌公忠鎮軍將軍安平侯竝加散騎常侍但皆丘墓夷滅申哀莫由有司其速班訪岳等子孫授己茅土稱朕意焉

晉書載記劉曜傳十六國春秋五

下書封喬豫和苞

二侍中懇懇有古人之風烈矣可謂社稷之臣也非二君朕安聞此言乎夫呂孝明于承平之世四海無虞之日尚納鍾離一言而罷北宮之役況朕之闇眇當今極弊而可不敬從明誨乎今敕悉停壽陵制度一遵霸陵之法詩不云乎無言不酬無德不報今封豫安昌子苞平輿子竝領諫議大夫可敷告天下使知區區之朝思聞過也自今法政有不利于時不利社稷者其詣闕極言勿有所諱

晉書載記劉曜傳十六國春秋五

劉娥

娥字麗華劉殷女聰既僭位召爲右貴嬪尋拜爲后死諡武宣

皇后

手疏啟救陳元達

伏聞將爲妾營殿今昭德足居鷄儀非急四海未一禍難猶繁動
須人力資財尤宜慎之廷尉之言國家大政夫忠臣之諫豈爲身
哉帝王拒之亦非顧身也妾仰謂陛下上尋明君納諫之昌下忿
闇主距諫之禍宜賞廷尉以美爵酬廷尉以列土如何不惟不納
而反欲誅之陛下此怒由妾而起廷尉之禍由妾而招人怨國疲
咎歸于妾距諫害忠亦妾之由自古敗國喪家未始不由婦人者
也妾每覽古事忿之忘食何意今日妾自爲之後人之觀妾亦猶
妾之視前人也復何面目仰侍巾櫛請歸死此堂以塞陛下誤惑
之過

晉書列女劉聰妻劉氏傳聰將起鷄儀殿其廷尉陳元達切諫聰大怒將斬之娥在後堂私敕左右停刑手疏啟云云又

見十六國春秋
人與此多異

劉易

易劉聰子封河閒王爲車騎大將軍進太尉拜太宰呂諫不用
忿恚死

諫用宦官王沈等表

臣聞善人者乾坤之紀政教之本也邪佞者宇宙之螟螣王化之
蝨賊也故文王曰多士基周桓靈曰羣閹亡漢國之興亡未有不
由于此也自古明王之世未嘗有宦者與政武元安順豈足爲故
事乎今王沈等乃處常伯之位握生死予奪于中勢傾海內愛憎
任之矯弄詔旨欺誣日內詔陛下外佞相國威權之重侔于人
主矣王公見之駭目卿宰望塵下車銓衡迫之選舉不復曰實士
已屬舉政已賄成多樹姦徒殘毒忠善知王琰等忠臣必盡節于
陛下懼其姦萌發露陷之極刑陛下不垂三察猥加誅戮怨感宮
蒼痛入九泉四海悲惋賢愚傷懼沈等皆刀鋸之餘背恩忘義之
類豈能如士人君子感恩展效已荅乾澤也陛下何故親近之何

故貴任之昔齊桓公任易牙而亂孝懷委黃皓而滅此皆覆車于前殷鑒不遠比年地震日蝕兩血火災皆沈等之由願陛下割翦兇醜與政之流引尚書御史朝省萬機相國與公卿五日一入會議政事使大臣得極其言忠臣得逞其意則眾災自弭和氣呈祥今遺晉未殄巴蜀未賓石勒潛有跨趙魏之志曹嶷密有王全齊之心而復呂沈等助亂大政陛下心腹四支何處無患復誅巫咸戮扁鵲臣恐遂成桓侯膏肓之疾後雖欲療之其如病何請免沈等官付有司定罪

晉書載記劉聰傳太宰劉易及大將軍劉敷御史大夫陳元達金紫光祿太夫王延等詣闕諫云云聰呂表示沈等寢之又見十六國春秋二

王彌

彌字子固東萊人惠帝末妖賊劉伯根呂爲長史伯根死劉淵呂爲鎮東大將軍青徐二州牧都督緣海諸軍事尋爲司隸校尉加侍中特進進征東大將軍封東萊公後爲石勒所殺

書賀石勒

公獲苟晞而用之何其神妙使晞爲公左彌爲公右天下不足定

也

晉書王彌傳勒擒苟晞曰爲左司馬彌謂勒云云又載紀石勒傳作僞卑辭使謂勒十六國春秋九作乃曰書賀勒又十一作

使賀

勒

陳元達

元達字長宏後部人劉淵僭號徵爲黃門郎劉聰時轉廷尉拜御史大夫呂諫不用自殺

諫起鷄儀樓

臣聞古之聖王愛國如家故皇天亦祐之如子夫天生烝民而樹之君者使爲之父母曰刑賞之不欲使殿屎黎元而逸蕩一人晉氏間虐視百姓如草芥故上天勦絕其祚乃眷皇漢蒼生引領息肩懷更蘇之望有日矣我高祖光文皇帝靖言惟茲痛心疾首故身衣大布居不重茵先皇后嬪服無綺綵重逆羣臣之請故建南

北宮焉今光極之前足曰朝羣臣饗萬國矣昭德溫明已後足可
曰容六宮列十二等矣陛下龍興已來外殄二京不世之寇內興
殿觀四十餘所重之以饑饉疾疫死亡相屬兵疲于外民怨于內
爲之父母固若是乎伏聞詔旨將營鸛儀中宮新立誠臣等樂爲
子來者也竊曰大難未夷宮宇靡給今之新營尤實非宜臣聞太
宗承高祖之業惠呂息役之後曰四海之富天下之殷尙惜百金
之費而輟露臺歷代垂美爲不朽之迹故能斷獄四百擬于成康
陛下之所有不過太宗二郡地耳戰宇之備者豈僅匈奴南越而
已哉孝文之廣思費如彼陛下之狹欲損如此愚臣所曰敢昧死
犯顏色冒不測之禍者也

晉書載記劉聰傳又十六
國春秋二多出七十餘字

王鑒

鑒仕劉聰至尙書令曰諫被斬

諫立左皇后

大四百六十一
小七十四

臣聞王者之立后也將曰上配乾坤之性象二儀敷育之義生承宗廟母臨天下亡配后土執饋皇姑必澤世德名宗幽閒淑令乃副四海之望稱神祇之心是故周文造周妣氏曰興闢雖之化饗則百世之祚永孝成任心縱欲曰婢爲后使皇統亡絕社稷淪傾有周之隆旣如彼矣大漢之禍又如此矣從麟嘉曰來亂淫于色縱沈之女弟刑餘小醜猶不可塵瓊寢汚清廟況其家婢邪六宮妃嬪皆公子公孫奈何一旦曰婢主之何異象褰玉簪而對腐木朽楹哉臣恐無福于國家也

晉書載記劉聰傳中常侍王沈養女年十四有妙色聰立爲左皇后尚書令王鑒中書監崔懿之中書令曹恂等諫云云聰覽之大怒皆斬之又見十六國春秋四

康相

相仕劉聰爲太史令

言天

虵虹見彌天一岐南徹三日並照客星入紫宮此皆大異其徵不

遠也今虹達東西者許洛已南不可圖也一岐南徹者李氏當仍
跨巴蜀司馬叡終據全吳之象天下其三分乎月爲胡王皇漢雖
苞括二京龍騰九五然世雄燕代肇基北朔太陰之變其在漢域
乎漢既據中原厯命所屬紫宮之異亦不在他此之深重何可盡
言石勒鴟視趙魏曹嶷狼顧東齊鮮卑之眾星布燕代齊代燕趙
皆有將大之氣願陛下已東夏爲慮勿顧西南吳蜀之不能北侵
猶大漢之不能南向也今京師寡弱勒眾精盛若盡趙魏之銳燕
之突騎自上黨而來曹嶷率三齊之眾已繼之陛下將何已抗之
紫宮之變何必不在此乎願陛下早爲之所無使兆人生心陛下
誠能發詔外已遠追秦皇漢武循海之事內爲高祖圖楚之計無
不克矣

晉書載記劉聰傳
又十六國春秋四

喬豫 和苞

豫苞竝仕劉曜爲侍中豫封安昌子苞平興子竝領諫議大夫

上疏諫營作

臣聞人主之興作也必仰準乾象俯順人時是曰衛文承亂亡之後宗廟社稷漂流無所而猶上儗營室曰構楚宮彼其急也猶尙若茲故能成康叔武公之迹曰延九百之慶也奉詔書將營豐明觀市道蒨蕘咸曰非之曰一觀之功可曰平涼州矣又奉敕旨復欲擬阿房而建西宮模瓊臺而起凌霄此則費萬豐明功億前役也曰此功費亦可曰吞吳蜀翦齊魏矣陛下何爲于中興之日而蹤亡國之事自古聖王人誰無過陛下此役實爲過舉過貴在能改終之實難又伏聞敕旨將營建壽陵周迴四里下深二十五丈曰銅爲棺槨黃金飾之恐此功費非國內所能辦也且臣聞堯葬穀林市不改肆顓頊葬廣陽下不及泉聖王之所終也如是秦皇下錮三泉周輪七里身亡之後毀不旋踵闇主之所終也如此向魑石梓孔子曰爲不如速朽王孫儼葬識者知其矯世自古無不

亡之國不掘之墓聖王知厚葬之招害也故不爲之臣子之于君父陵墓豈不欲高峻如山岳哉但已保全始終安固萬世爲優耳自喪亂已來漢帝諸陵咸見踐辱惟霸陵獨全此雖太宗之至達抑亦釋之之功

自喪亂已下三十一國春秋補

興亡奢儉固然于前惟陛下

覽之

晉書載記劉曜傳又見十六國春秋五

關名

中丘城寺碑

大和上佛圖澄願者天竺大國罽賓小王之元子本姓溼所已言

溼者思潤理國澤被無外是已號之爲溼

封氏聞見記八邢州內丘縣西古中丘城寺有

碑後趙石勒光初五年所立也碑云云案光初趙劉曜年號是時石勒尙奉趙朔故碑題光初五年也

白玉文

皇亡皇亡敗趙昌井水竭構五梁罽西小衰困囂喪嗚呼嗚呼赤

牛奮勒其盡乎

晉書載記劉曜傳終南山崩長安人劉終于崩所得白玉方一尺有文字云云又見水經渭水注中

又十六國
春秋六

賜進士出身二品銜廣東等處提刑按察使司按察使兼管驛傳事務黃岡王毓藻校刊

全晉文卷一百四十七終

大二十
小九